



O‘ZBEKISTON PREZIDENTI MDHNING NORASMIY SAMMITIDA ISHTIROK ETDI

O‘zbekiston Respublikasi Prezidenti Shavkat Mirziyoyev 26-dekabr kuni Sankt-Peterburg shahrida MDHga a‘zo davlatlar rahbarlarining norasmiy uchrashuvida ishtirok etdi.



Tadbirida Rossiya Prezidenti Vladimir Putin, Ozarbayjon Prezidenti Ilhom Aliyev, Belarus Prezidenti Aleksandr Lukashenko, Qozog‘iston Prezidenti Qosim-Jomart Toqayev, Qirg‘iziston Prezidenti Sadir Japarov, Tojikiston Prezidenti Emomali Rahmon, Turkmaniston Prezidenti Serdar Berdimuhamedov va Armaniston Bosh vaziri Nikol Pashinyan qatnashdi.

Uchrashuvda 2023-yilgi ko‘p tomonlama hamkorlikning asosiy yakunlari sarhisob qilindi va kelgusi yilga mo‘ljallangan ustuvor vazifalar ko‘rib chiqildi.

MDH doirasida ko‘p qirrali munosabatlarni rivojlantirish istiqbollari yuzasidan fikr almashildi, mintaqaviy ahamiyatga molik dolzarb masalalar muhokama qilindi.

Ta‘kidlash joizki, so‘nggi yillarda mamlakatimiz Hamdo‘stlikda faol ishtirok etmoqda.

O‘zbekiston 20 dan ortiq tarmoq bo‘yicha hamkorlik organlariga hamda ustuvor soha va tarmoqlar bo‘yicha 24 ta muhim bitimga qo‘shildi.

MDH mamlakatlari kompaniyalari bilan sanoat kooperatsiyasi bo‘yicha

loyihalar portfeli 30 milliard dollardan oshdi va deyarli barcha tarmoqlarni qamrab olgan.

Davlatimiz rahbari MDH doirasidagi amaliy hamkorlikni tubdan kengaytirish va hamkorlikning amaldagi institutsional mexanizmlari samaradorligini oshirish zarurligini alohida qayd etdi.

Shu kuni Sankt-Peterburg shahridagi MDH norasmiy sammiti doirasida O‘zbekiston Respublikasi Prezidenti Shavkat Mirziyoyev va Rossiya Federatsiyasi Prezidenti Vladimir Putinning uchrashuvi bo‘lib o‘tdi.



Joriy yilning 5-7-oktabr kunlari Rossiyaga amalga oshirilgan oliy darajali tashrif yakunida erishilgan kelishuvlarni ro‘yobga chiqarish masalalariga alohida e‘tibor qaratildi.

Tovar ayirboshlashning o‘shish sur‘atini saqlab qolish hamda istiqbolli kooperatsiya loyihalarini ilgari surish maqsadida yaqin idoralararo muvofiqlashuv va amaliy hamkorlikni, shu jumladan, ikki mamlakat hududlari darajasida ta‘minlash muhimligi qayd etildi.

Mintaqaviy kun tartibi yuzasidan ham fikr almashildi.

MDH norasmiy sammitining madaniy tadbirlar dasturi doirasida O‘zbekiston Respublikasi Prezidenti Shavkat Mirziyoyev Sankt-Peterburg shahrining saroy-bog‘ majmualari bilan tanishdi.

Davlatimiz rahbari Rossiya, Ozarbayjon, Armaniston, Qozog‘iston, Qirg‘iziston, Tojikiston va Turkmaniston yetakchilari bilan birgalikda “Pavlovsk”, “Sarskoye selo” va “Petergof” muzey-qo‘riqxonalariga tashrif buyurdi.

XVIII-XIX asrlarda barpo etilgan ushbu tarixiy obidalar UNESCO Butunjahon

meros ro‘yxatiga kiritilgan, me‘morchilik va bog‘chilik san‘ati durdonalari sifatida tan olingan.

Tanishuv chog‘ida davlat rahbarlariga saroylar tarixi, ularning ichki bezagi va badiiy to‘plamlari to‘g‘risida batafsil so‘zlab berildi. Oliy martabali mehmonlar e‘tiboriga musiqa va xalq og‘zaki ijodi jamoalarining chiqishlari havola etildi.

Shu bilan O‘zbekiston Respublikasi Prezidenti Shavkat Mirziyoyevning amaliy tashrifi yakunlandi.

O‘ZA

BIZNING SUHBAT

RENESSANS ZABTI
MA‘NAVIY-AQLIY HODISALARDAN
QUVVAT OLADI

“Tarjimon ham, yozuvchi, shoir ham hech qachon did-farosatda zamondosh o‘quvchiga moslashib, tenglashib ijod qilolmaydi. Ijodkor hamma vaqt did-farosat, vijdonlilikda zamondan, zamondoshlaridan ancha oldinroqda yuradi. Bo‘yi ommaning bo‘yiga baravar, qilg‘i ommaning qilg‘idan farq qilmaydigan, o‘z fikriga ega bo‘lmagan kishi qanday qilib yozuvchi, shoir, san‘atkor, tanqidchi, tarjimon bo‘lishi mumkin? Yo‘q, ijodkor hamma vaqt chuqurroq o‘ylaydi, uzoqroqni ko‘radi, umummanfaatni o‘tkirroq, teranroq tushunadi. Shuning barobarida u ijodkor deb ataladi”.

O‘zbekiston Qahramoni Ibrohim G‘AFUROVning ushbu so‘zlari bu galgi diydorlashuv uchun o‘ziga xos muqaddima bo‘ldi. Adabiyotshunos olimimizning nihoyasiga yetayotgan 2023-yil

voqeliklari, o‘zgarishlari, fikr to‘liqlari va dolg‘alari haqidagi xulosalari sizni ham befarq qoldirmasligiga ishonamiz.

Davomi 5-betda

DUNYO E‘TIROFI

O‘ZBEKISTON TASHABBUSI BILAN
QABUL QILINGAN REZOLYUTSIYA
MARKAZIY OSIYO DAVLATLARINI
YAGONA MAQSAD
YO‘LIDA BIRLASHTIRADI

O‘zbekiston Prezidenti tashabbusi bilan bir ovozdan qabul qilingan BMT Bosh Assambleyasining “Markaziy Osiyo global iqlim tahdidlari qarshisida: barqaror rivojlanish va farovonlik yo‘lida mintaqaviy birdamlikni mustahkamlash” rezolyutsiyasi ekspertlar hamjamiyati va mazkur tuzilma ixtisoslashgan tashkilotlari vakillari tomonidan yuqori baholanmoqda.

Rezolyutsiya qabul qilingandan so‘ng BMT Axborot xizmati ushbu global hujjatning mazmun-mohiyati va ahamiyatiga bag‘ishlangan tahliliy maqolani e‘lon qildi. BMTning yuqori martabali

vakillari ushbu muhim hujjat Bosh Assambleya tomonidan muvaffaqiyatli qabul qilingani munosabati bilan samimiy fikrlarini bildirdi.

Davomi 2-betda

BUYUK O‘ZBEK YO‘LI

KUCHLI MA‘NAVIYAT –
JAMIYATNI POKLANTIRUVCHI YOG‘DU

Bugun barchamiz — katta-yu kichik, ayol-u erkak Respublika Ma‘naviyat va ma‘rifat kengashining 22-dekabr kuni davlatimiz rahbari ishtirokida o‘tkazilgan kengaytirilgan yig‘ilishi taassurotlari bilan yashaymiz. Katta-kichik davralar, odamlar orasida yig‘ilishda ilgari surilgan fikr va g‘oyalarni, mulohazalar, asosli xulosalar muhokama qilinmoqda. Quvonarlisi, butun jamiyat unda ko‘tarilgan masalalarning nechog‘liq ahamiyatli ekanini, barchamiz kelgusi avlod taqdiri uchun mas‘ulligimizni bot-bot ta‘kidlamog‘da.



Yig‘ilishda ko‘tarilgan masala jamiyatning barcha sohalariga — xoh u iqtisodiyot, xoh siyosat, xoh yoshlar tarbiyasi bo‘lsin, mamlakat va millat taqdiri uchun o‘ta muhim ma‘naviyat, ma‘rifat, tarbiya masalalariga daxldor bo‘lgani uchun ham katta ijtimoiy qiziqish uyg‘otdi.

Davlatimiz rahbarining ma‘ruzasini uning mamlakat va millat taqdiri uchun jon kuydirish, yuksak mas‘ullik namunasini sifatida baholash mumkin. Buni esa bugun butun jamiyatni, eng avvalo, ziyolilarimizni uyg‘otishga, ularning bundan 7 yil avval boshlangan tub islohotlarga daxldorlik darajasini yanada kuchaytirishga da‘vat tarzida tushunish to‘g‘ri bo‘lardi.

Davomi 3-betda

BUGUNNING GAPI

AQSH BOZORIGA “KIRISH CHIPTASI”

uni O‘zbekiston ishlab chiqaruvchilari
Markaziy Osiyoda birinchi bo‘lib qo‘lga kiritdi

Bugun jahon bozoriga kirish oson emas. Bozor tartib-qoidalarini-xaridorlar talabi ancha o‘sgan. Did baland. Quvonarlisi, shunday sharoitda o‘zbekistonlik ishlab chiqaruvchilar xalqaro bozorlarni zabt etishning uddasidan chiqmoqda. Gap shundaki, Prezidentimizning 2023-yil 10-yanvardagi “Paxta-to‘qimachilik klasterlari faoliyatini qo‘llab-quvvatlash, to‘qimachilik va tikuv-trikotaj sanoatini tubdan isloh qilish hamda sohaning eksport salohiyatini yanada oshirish chora-tadbirlari to‘g‘risida”gi farmonida joriy yilda “O‘zto‘qimachilik sanoat” uyushmasi zimmasiga ushbu yo‘nalishdagi eksport hajmini 2,6 barobar oshirish vazifasi qo‘yilgan edi. Shu bois, tizimda “Made in Uzbekistan” brendi ostidagi mahsulotlarni tashqi bozorlarga, jumladan, AQSH bozoriga olib kirish bo‘yicha tizimli ishlar olib borildi.

Ma‘lumotlarga ko‘ra, 2022-yilda Osiyodan AQSHga qiymati 5,5 milliard dollardan ziyod gazlama va mato eksport qilingan. Bu O‘zbekiston to‘qimachilik korxonalarini uchun ham keng imkoniyat yaratdi. WRAP (Worldwide Responsible Accredited Production) xalqaro ijtimoiy sertifikatini esa ushbu bozorga “kirish chiptasi”dir.

Nima uchun aksariyat to‘qimachilik korxonalarini mazkur sertifikatni qo‘lga kiritishga intiladi? Buning birinchi sababi, okeanorti mamlakatining katta ehtiyoji. Ya‘ni AQSH bozori bir yilda 100 milliard dollarlik to‘qimachilik mahsulotlarini



import qiladi. Bu butun Yevropa Ittifoqi davlatlari ehtiyojidan ham ko‘p. Qolaversa, eng nafuzli va tanikli savdo brendlari ham shu yerda joylashgan.

Davomi 4-betda

